

Gipuzkoako Aldizkari Ofiziala

147. zenbakia

Data 2005-08-04

16128 orria

7 UDAL ADMINISTRAZIOA

USURBILGO UDALA

Udal erregelamendu organikoa aldatzea. Behin betiko onespena.

USURBILGO UDALA

Iragarkia

Usurbilgo Udalbatza Plenoak, 2005eko uztailaren 26an egindako bilkuran, Udal Arautegi Organikoaren Aldaketa behin betiko onartutzat eman zuen, honako akordioaren arabera:

«Toki-Araubidearen Oinarriak arautzen dituen apirilaren 2ko 7/85 Legearen 49. artikuluan xedaturikoa ikusirik, Usurbilgo Udaleko Erregelamendu Organikoaren Aldaketa behin betikotzat onartua izan dela, honako testuaren arabera:

UDAL ARAUTEGI ORGANIKOA

LEHEN SEKZIOA

SARRERA

Honako proposamen honen helburua zera da, Usurbilgo Udalaren funtzionamenduan gutxieneko irizpide demokratikoak bermatzea.

1. Beti ere eta beharrezko gertatzen den guztietan edozein biztanle edo erakunderen partaidetza ahalbidetuz udal bizitzan.
2. Biztanleen edo udalerriko bestelako erakundeen partaidetza erraztuz eta sustatuz instantzia desberdinetan, hala nola Informazio Batzordeetan, Tokiko Gobernu Batzarra zein Udalbatzar Osoko Bilkuran.

Udal Administrazioa Informazio batzordeen lanean bermatuko da, hauek aztertuko baitituzte dagokien eremuko lan eta eskari desberdinak, erabakitzeko gaitasuna duten organu exekutiboek aurkeztuko zaizkien irizpenak ematearren.

Tokiko Gobernu Batzarra mantendu egingo da, udal jestioa ahalik eta eraginkortasun, arintasun eta transparentzi handienaz hornitzearren.

1. artikulua.

Udal Gobernua eta Administrazioa Udalarik dagokio, eta indarrean dagoen hauteskunde-legeriak ezarritako moduan hautatutako Alkatea eta Zinegotziak dira horren kideak.

2. artikulua.

2.1. Ondoren zehazten diren organuen bidez gauzatuko du bere iharduera Udalak:

A) Erabakitzeko gaitasunaz:

a) Alkatea.

b) Gobernu Batzordea.

c) Alkateordeak, Alkatea ordezkatzuz eta ezartzen den ordenari jarraiki.

d) Udalbatzar Osoko Bilkura.

B) Aztertzeko, argitzeko eta proposatzeko gaitasunaz:

a) Informazio batzordeak.

b) Aholku Batzarrak.

c) Zubietako Herri-Batzarra.

2.2. Udala honako Erakunde, Organismo edo Elkarteetan hartuko du parte:

a) Añarbeko Uren Mankomunitatea.

b) San Markos Mankomunitatea.

c) Elkarkidetza.

d) Kirol Patronatua.

e) Uema.

f) Eudima.

g) Atallu Industri Sustapena S.A.

h) Euskal Fondoa

i) Behemendi Elkartea.

j) Hezkuntza arloko organuak: Udarregiko Zuzendaritza Batzordea, Haur-Eskola, Zubietako eta Aginagako Eskola-Kontseiluak, Lanbide Eskolako Kontseilua, EPA-ko kontseilua

k) EUDEL.

Gaur egungo legeriaren arabera Usurbilgo Udaleko Udal Osoko Batzarrak eskumena izango du edozein Erakunde, Organismo eta Elkarteetan parte hartzeko edo bere partaidetza bertan behera uzteko.

BIGARREN SEKZIOA

ALKATEA

3. artikulua.

1.Udalerria gobernatu eta administratzeko lana Udalaren eskumenekoa da, Alkatearena eta Zinegotziena alegia; Udalbatzarraren organu gorena Udalbatzar Osoko Bilkura da, aipatu guztiek osatua, eta honek Buru Alkatea izango du.

2.Alkatearen eskumenak:

Legeek eta indarreko bestelako arauak kasuz kasu eman diezazkioten eskumen guztiak dagozkio Alkateari. Halaber; Plenoak berariaz delegatzen dizkion eskumenak izango ditu Alkateak, eskuordetzan eman ahal direnak kontutan harturik Edozein unean, Udalbatza Plenoak bereganatu ahal izango ditu delegaturiko eskumenak

HIRUGARREN SEKZIOA

ALKATEORDEAK

4. artikulua.

4.1.Izendapena.

Alkateak izendatuko ditu, libreki, Alkateordeak, eta berak utziaraziko die kargua.

Izendapenak eta utzerazteak Alkatearen erabakiz egingo dira, eta hauen berri emango zaio egiten den aurreko Udalbatzar Osoko Bilkurari, izendatutakoei ere jakinerazpen pertsonala eginez.

4.2.Eskuduntzak.

Alkateordeek, halakotzat harturik eta izendapenaren hurrenkeraren arabera, Alkatea ordezkatu ahal izango dute, bai bakante bat sortzen denean, bai kanpoan denean, bai gaisorik dagoenean. Tokiko Gobernu Batzarreko partaideen artetik Alkateordeak libreki izendatuko dira eta baita ere libreki beraien izendapena atzera bota dezake Alkateak.

Alkatearen ordezkariak Alkateordeak Tokiko Gobernu Batzarrari eman beharko dio burututako lanaren berri, egiten den aurreneko saioan bertan.

LAUGARREN SEKZIOA

TOKIKO GOBERNU BATZARRA

5. artikulua.Osaketa.

5.1. Tokiko Gobernu Batzarraren kideak Alkatea eta hainbat zinegotzi izango dira, hauen kopuruak ezingo duelarik, inoiz, zinegotzi guztien legezko kopuruaren herenetik gora egin.

5.2. Tokiko Gobernu Batzarreko kideak Alkateak izendatzen ditu, eta Alkateak berak, libreki, baztertu ere eginkizun honetatik.

5.3. Aurreko atalak Alkatetzari egokitzen dizkion ahalmenen kaltetan gabe, Tokiko Gobernu Batzarra osaturik geratuko da Alkateak kideak izendatu eta hurrengo hamar eguneko epearen barnean.

5.4. Honen inguruan egiten duen izendapen ororen berri emango dio Alkateak Udalbatzar Osoko Bilkurari, egiten den aurreko saioan bertan.

6. artikulua. Funtzionamendua.

6.1. Ohiko Bilkurak hileko 2. eta azkeneko asteartetan egin beharko dira Batzarreko Lehendakariak ezarritako orduan; honek, gainera, aparteko saioa deitu ahal izango du egoki iritziz gero.

6.2. Hiru lanegun aurretik Alkateak gai zerrenda egingo du, eta Tokiko Gobernu Batzarrean parte hartzen duten taldeko kideek aukera izango dute eskaerak bertan sartzeko. Deialdia eta berari dagozkion erizpenak bi lanegun aurretik heleraziko zaizkie partaideei.

6.3. Tokiko Gobernu Batzarra baliozkoa izateko ezinbestekoa da kideen gehiengo absolutua egotea.

6.4. Orokorrean, Tokiko Gobernu Batzarrean jorratu behar diren gai guztiak eta beraiei dagozkien beharrezko irizpen eta txosten teknikoak espedientetan egongo dira, osagarritzat eramango direlarik, premiazko kasutan ezik

6.5. Arrazoituta, Alkateari eskatzen dioten Zinegotziek, bertaratu daitezke Tokiko Gobernu Batzarrera. Eta biztanleen partaidetzari dagokionean, beti ere jorratu behar diren gaiak zuzenean ukitzen dituztenean, beraien parte hartzea Alkateari eskatu beharko diote, eta hitza izango dute Batzarrean.

6.6. Batzarraren saio bakoitzaren akta bat egingo da, bertan, eta oinarrizko atal gisa, honako hauek jasoko direlarik:

—Eguna, hila eta urtea.

—Saioaren hasiera eta amaiera.

—Agertutako kideak.

—Jorratutako gaiak.

—Egindako erizpenak.

—Interbentzioen arrazoinamenduak eta botazioak, horrelakorik izan baldin bada.

6.7.Tokiko Gobernu Batzarrean gai zerrendak jendaurrean azalduko dira.

6.8.Deialdia Alkateak berak egingo du, 2 lanegun lehenago gutxienez, Udalbatzarreko Zinegotzi guztiei jakineraziz aipatutako deialdia, horretarako prestatutako buzoietan.

6.9.Ekintza mota: Erabaki moduan, legezko botazioaz Udalbatzar Osoko Bilkurak edo Alkateak delegatutako eskuduntzak, edota Legeak atxikitakoak erabiltzen dituenan.

6.10.Saioetako Aktak udal talde guztiei banatuko zaizkie.

7. artikulua.Eskuduntzak.

Legeek eta indarreko bestelako arauak kasuz kasu eman diezazkieten eskumen guztiak dagozkio Tokiko Goernu Batzarrari. Halaber; Plenoak, ebazpenaren bidez, edo Alkateak, dekretuaren bidez, espreski delegatzen dizkieten eskumenak izango ditu Tokiko Gobernu Batzarrak, eskuordetzan eman ahal direnak kontutan harturik. Edozein unean, Udalbatza Plenoak edo Alkateak bereganatu ahal izango dituzte delegaturiko eskumenak.

BOSGARREN SEKZIOA

UDALBATZA OSOKO BILKURA

8. artikulua.Osaketa.

8.1.Udalbatza Osoko Bilkura zinegotzi guztiek osatzen dute, eta Alkatea du buru.

9. artikulua.Funtzionamendua.

—Saio arruntak:

9.1.Alkate-Udalburuak hilean behin Osoko Bilkura Arrunterako deia egingo du. Saio Arruntak hilaren azken asteartetan egingo dira.

9.2.Plenoko gaiak eta beraiei dagozkien erizpen eta espedienteak hiru lanegun aurretik egongo dira Idazkaritzan. Plenoko deialdia eta erizpenak bi lanegun lehenago banatuko zaizkie Korporatiboei. Halaber, edozein udal talde politiko edo Zinegotzik aukera izango du, nahi izanez gero, eskaerak edo proposamenak aurkezteko. Eskaera hauek behar diren diktamenekin aurkeztu beharko dira eta aztertu ahal izango dira, beti ere Udalbatzako bilkura baino 24 ordu aurretik aurkezten badira.

9.3.Gai zerrendan, aldeztu aurretik diktamen baten bidez jakinaraziak edo dagokion Batzorde Informatiboetan jakinaraziak izan diren gaiak sartu ahal izango dira.

9.4.Premiazko arrazoiak direla eta, Alkateak, bere kabuz edo beste edozein Zinegotzik proposatuta, gai-zerrendan sartu ahal izango ditu Batzorde Informatiboetan diktaminatuak izan ez diren gaiak. Baina kasu hauetan Udal Batzarrak gai hauek gai-zerrendan sartzea onesten ez duen bitartean ezin izango dira erabakiak hartu. Era

berean, gai-zerrendako edozein gai mahai gainean utzi ahal izango da Zinegotzi talde baten eskariz, gehiengo arruntak hala erabakitzen badu.

9.5.Deialdia Zinegotziei jakinarazi beharko zaie horretarako dauden buzoietan, gai zerrenda eta beharrezko dokumentazio guztia, erabaki-proposamenak barne, igorritz, eta gutxienez bi lanegun lehenago. Aldi berean, Udalak publiko egingo ditu Osoko Bilkuretarako deialdiak Udaletxeko iragarki taulan.

—Aparteko saioak:

9.6.Aparteko saioak, Alkateak deituko ditu, bere kabuz edo udal talde politikoren zinegotzik eskatuta, baldin eta korporazioko kideen laurdena osatzen badute. Eskari hauek arrazoa azalduz idatziz aurkeztuko dira eta eskatzaile guztien sinadura izango dute, eskaera izenpetzen duen bakoitzak urtean hiru aldiz eskubide hau erabili dezakeela kontutan harturik.

9.7.Udal batzarkideek eskatutako aparteko saioaren deialdia eskari hau egin ondorengo 4 lanegunen barruan egin beharko da, eta saioa bera ezingo da hamabost egun baino gehiago atzeratu, idatzia errejistro orokorrean sartu den egunetik kontatzen hasita. Zinegotziek eskaturiko bilkura berezia Alkateak konbokatuko ez balu, hurrengo hamargarren lanegunean eguerdiko hamabitan ospatuko da, eta horretarako Idazkariak dagokien deialdia luzatuko die.

—Aparteko eta premiazko saioak:

9.8.Aparteko saioa deitzeko aurrez behar den eta apirilak 2ko 7/1985 legean ezarritako 2 laneguneko epea betetzea ezinezkoa denean aztertu beharreko gaiaren edo gaien premiazkotasunagatik, aparteko eta premiazko saioak izango dira Alkateak edo Lehendakariak horrelakoetan deitutakoak.

Premiazkoak diren aparteko Udal Osoko Bilkurak, eskaera egiten den unetik 24 orduko epean egingo dira.

Honelako kasuetan, gai-zerrendako lehenbiziko gaia Osoko Bilkurak premiazkotasuna erabakitzeke izango da. Bilkurak ez badu premiazkotzat jotzen, amaitutzat emango da, besterik gabe saioa.

—Bilkuren erregimena:

9.9.Udal Batzarraren saioak burutu ahal izateko beharrezkoa izango da Korporazioko kide legalaren heren bat aurkeztea. Quorum hau bilkura guztian mantendu beharko da. Beharrezkoa izango da baita ere Lehendakaria eta Korporazioko Idazkaria edo beraien ordezkokoak bertaratzea. Zinegotzien botua pertsonala da, eta ez dago delegatzerik. Botua baiezkoa edo ezezkoa izan daiteke, Udalbatzarkideek abstentzioa ere aukeratu dezaketelarik. Erabakiak ohiko bozketaren bidez hartuko dira, baldin eta Udal Batzarrak gai baterako erabakitzen badu izenezko bozketa egin behar dela. Edozein arrazoi dela eta Saio Aretotik irtendako Batzarkideek abstentzioa aukeratu dutela joko da, proposamena botazioara ematen den unean.

9.10. Udal Batzarrako bilkurak publikoak izango dira. Bilkura burutu baino bi egun lehenago Idazkaritzatik herritarrei herrian dauden iragarki taulen bidez jakinaraziko zaie bilkuren berri. Udal Batzarraren bilkurak jarraitu ahal izateko behar den infraestruturaz egokituko da.

9.11. Bilkura bakoitzean akta bat jasoko da. Akta hau Udaleko Idazkariak sinatuko du eta honako edukina izango du:

—Eguna, hila eta urtea.

—Bilkuraren hasiera eta bukaera.

—Agertutako kideak.

—Jorratutako gaiak.

—Hartutako erabakiak.

—Izandako interbentzioen laburpena eta bozketak.

9.12. Mozioak: Gai-zerrendan sartu ahal izateko beharrezkoa izango da Zinegotzi batek eskatzea eta bilkura hasi baino 72 ordu baino lehen Alkateari aurkeztea, premiazko kasutan ezik.

9.13. Mozioei egindako emendakinak idatziz aurkeztuko dira 24 ordu lehenago gutxienez Alkatetzari, Udalbatzarkide guztiei kopia bana eskuratu ahal izatearren.

9.14. Edozein Erakunde edo bizilagunek Zinegotzi edo Udaletxean ordezkari bat duen talde politiko baten bidez aurkeztu ditzazke mozioak Udal Batzarrako gai-zerrendan sartzeko.

9.15. Zinegotzi ez diren herritar guztiek ere eskubidea izango dute beren iritzia berak adierazteko, honako baldintza hauek betez:

a) Gai-zerrendako gai bakoitzean.

b) Aurrez Alkateari eskatuz eta honek baimenduz gero.

c) Interbentzioa eztabaidatzen ari den gaiaren ingurukoa izango da.

9.16. Gai-zerrenda guztiak publiko egingo dira. Osoko Bilkureetan hartutako erabaki guztiak bezalaxe, eta herriko Pentsara eta eskatzen duten Elkarte zein Erakunde guztietara igorriko dira.

10. artikulua. Udal Batzarraren eskuduntzak.

Indarrean dagoen lege eta araudiek atxikitzen dizkion eskumen guztiak izango ditu Udalbatza Plenoak, Araudi honen 3.2 eta 7. artikuluetan xedaturikoaren kalterik gabe.

SEIGARREN SEKZIOA

UDALBATZAR OSOAK BESTE GOBERNU ORGANUEN IHARDUERA KONTROLATZEAZ ETA FISKALIZATZEAZ

11. artikulua.

Udalbatza Osoak beste gobernu organuen iharduera kontrolatzea eta fiskalizatzea honako baliabide hauen bidez egingo da:

- a) Ordezkaritzaren bat duten Udalbatzarkideen presentzia eta informazioa eskatuz.
- b) Gobernu Batzordearen iharduerari buruzko eztabaidak.
- c) Alkate edo Udalburuari jarritako zentsura mozioak eta Alkateak planteaturiko konfidantza gaiak.

ZAZPIGARREN SEKZIOA

INFORMAZIO BATZORDEAK

OSAKETA

12. artikulua.

21.1. Informazio-Batzordeak korporazioko kideek soilik osatzen dituzte, eta ez dute ahalmen erabakitzailearik Plenoak eta, bere eskuordetzan aritzen denean, Tokiko Gobernu Batzarrak, erabakiko dituzten gaiak aurretik aztertu, informatu eta kontsultatzea izango dira Batzorde Informatzaileen eginkizunak, premiazkotzat hartzen diren akordioetan ezik. Halaber, Alkateak eta Tokiko Gobernu Batzarrak espreski hala erabakitzen dutenean, beraiei dagozkien gaiak informatu ahal izango dituzte aipaturiko Batzordeek.

12.2. Batzorde Informatzaileen hasierako kopuru eta izena Udalbatza Plenoak erabakiko ditu, Alkateak proposatuta. Halaber, Udalbatza Plenoak, osaketa unean, Batzorde hauen ohiko bilkuretako maiztasuna ebatziko du. Eraturiko Batzordeen osaketak eta bilkuren maiztasunak era honetan indarrean jarraituko dute, Udalbatza Plenoak berariaz aldatzen ez duen bitartean.

12.3. Batzorde Informatzaileak, Iraunkorrak edo Bereziak izan daitezke. Batzorde Iraunkorrak era orokorrean osatuko dira, Plenoak ebatziko dituen gaiak banatuz. Horien kopuru eta izena, Udaleko zerbitzuak antolatzeke sortu diren sailekin bat etorriko dira.

12.4. Batzorde Iraunkorren artean, Kontuen Batzorde Berezia nahitaezkoztat eratuko da. Udalbatza Plenoak ebatzi behar dituen aurrekontu nahiz aurrekontutik kanpoko kontuak aztertu, ikertu eta informatzea izango dira Batzorde honen eginkizunak. Bestaldetik, Batzorde Informatzaile honek era iraunkorrean jardungo du, udaleko ekonomia eta ogasunari buruzko gai guztietan.

12.5. Informazio-Batzorde Bereziak, gai zehatz bat aztertzeko eratuko ditu Udalbatza Plenoak, gaiaren edozein motatako ezaugarri bereziak kontutan harturik. Batzordearen xedea diktaminatu edo informatu ondoren, automatikoki amaituko da dagokion Batzorde Informatzaile Bereziaren indarraldia, Udalbatza Plenoak, eratze-ebazpenean, bestelakoa erabaki ezean.

12.6. Informazio-Batzordeek, egiten duten aurreneko bileran bertan zehaztuko dute beren bilkuren araubidea, eta indarrean mantenduko da berariaz aldatzen ez den bitartean, jorratu beharreko gaien garrantzia edo premiatasuna dela-eta batzordeburuaren eritziz beharra dagoenean, aparteko bilerak deituko direlarik.

12.7. Batzorde Informatzaileen eginkizuna, batzorde bakoitzaren esparruko proposamenak aztertzea izango da, dagozkien diktamenak eman ahal izateko. Erizpide hauek izaera prezeptiboa izango dute, ez ordea loteslea. Udalbatza Plenoa, Alkatea edo Tokiko Gobernu Batzarraren aurrean aurkezturiko erizpideetan, Batzorde Informatzaileek espedientean dagoen ebazpen-proposamenarekin adostasuna edo desadostasuna adieraziko dute

13. artikulua.

13.1. Informazio-Batzorde guztien berezko Lehendakaria Alkatea da. Hala ere, Batzordearen lehendakaritza ez balu bere gain hartuko, Batzordeak proposaturiko Zinegotziaren esku utz dezake kargu hau, dagokion hautaketa egin ondoren. Batzorde bakoitzeko Lehendakariak izango du bere gain bilerak deitu, bertan buru izan eta eztabaidak dinamizatzeko eta zuzentzeko eginkizuna, bilerak egingo diren eguna eta ordua zehaztekoarekin batera.

13.2. Batzordekide kopuru handiena 8 lagunekoa izango da. Udal Talde politiko bakoitzak izango du ordezkari bat gutxienez Batzorde bakoitzean, uko egiten ez duen bitartean, eta gehienez hiru ordezkari.

13.3. Informazio-Batzordeetara atxikitako ordezkari eta horien ordezkoen zerrenda, Udal Talde Politiko bakoitzaren Bozeramaileak luzaturiko idatzian gauzatuko da, Alkatezaren aurrean aurkeztuko delarik. Alkateak, idatzi honen berri emango dio Udalbatza Plenoari.

FUNTZIONAMENDUA

14. artikulua.

14.1. Informazio batzordeen maiztasunaz, hilean behin deitu beharko dira gutxienez. Hauetarako deialdiak gutxienez bi lanegun aurretik egingo dira beharko du. Batzordeetako kide guztiek proposatu ahal izango dute bilkurako gai-zerrendan edozein gai sartzea, behar adineko aurrerapenez eginez gero. Informazio batzorde bakoitzeko Buruak, egingo den bilkurako gai-zerrendarekin batera, aurreko bilerako akta eta bilerarako beharrezkoa den dokumentazio guztia eskuratu beharko dizkie batzordekideei.

14.2. Informazio-Batzordeetako bilkuretan, kideoren ez diren pertsonen parte har dezakete, Batzordeburuak baimenduz gero, gai zehaz bati buruz haien informazioa eskuratu, eritzia entzun, edo dagokien txostena jasotzeko helburu soilarekin.

Erizpideetan bakarrik agertuko dira Batzordekideen eritziak, baina, beharrezkoa izango balitz, Batzordeetako bilkura-aktetan Batzordekide ez direnek azaldutako iritzi edo informazioak jaso ahal izango dira. Irizpen edo proposamenak dagokion udal organoari helaraziko zaizkio.

14.3. Bilera baliozkoa izateko ezinbestekoa da bertan Batzordeburua eta batzorde-idazkaria egotea, edo hauen legezko ordezkariak titularrek agertzerik izan ez dutenean. Beharrezkoa izango dira, gutxienez, Informazio Batzordeko 3 kide eta bi udal talde politiko bertaratzea.

14.4. Aholku Batzarretan ematen diren proposamenak dagokien Batzorde Informatzailetara helaraziko zaie.

ZORTZIGARREN SEKZIOA

ZUBIETAKO HERRI-BATZARRA

15. artikulua.

15.1. Zubietako Herri-Batzarra, administrazioaren organu osagarria da, udal eskuduntzako gaien kudeaketa hobetzeko, dagokion lurralde-eremuan herritarren partaidetza erraztuz.

15.2. Zubietako Herri-Batzarraren osaketa, antolakuntza eta lurralde-eremua, 1995eko urriaren 5ean Gipuzkoako Aldizkari Ofizialean argitaraturiko Usurbilgo Udal Araudiaren 1. Eranskinean arautzen dira.

BEDERATZIGARREN SEKZIOA

ZINEGOTZIEN ESKUBIDEAK

16. artikulua.

15.1. Zinegotzi guztien eskubidea da Korporazioaren zerbitzuei buruz eta zinegotzien eginkizuna betetzeko beharrezkoak diren aurrekari, datu edo informazio guztiak Alkatearengandik jasotzea.

15.2. Zinegotzi guztiek Alkatetzako Dekretu liburuak ikusteko aukera izango dute.

15.3. Udal espedienteak Udaletxean aztertuko dira, eta beharrezkoa izango balitz, kopiak aterako dira. Espedienteak Udaletxetik kanpora ateratzeko Udal Lehendakariaren baimena beharko da.

17. artikulua. Udal talde politikoaren eraketa

17.1. Zinegotziek, udalbatzan iharduteko, talde politikoak osatuko dituzte

17.2. Osatzen diren udal talde politikoak, hauteskudetara aurkeztu eta hautatu diren alderdi politikoak izango dira.

17.3.Hauteskundetara aurkeztutakoak, alderdien federazioak edo koalizioak badira, federazio edo koalizio hori osatzen duten alderdi politiko bakoitzak udal talde politikoa osa dezake.

17.4.Zinegotzi bakarra lortu duten zerrendek eskubidea izango dute kide bakarreko udal taldeak osatzeko.

17.5.Zinegotziak ezin dira aldi berean bi talde politikoko kide izan.

18. artikulua.Udal talde politikoen aldaketak.

18.1.Udal Taldea politikoak eraturakoan, Araudi honetako 16.3 artikuluan aplikatzekoak zaizkien taldeak bakarrik banandu ahal izango dira.

18.2.Hauek osatuko dute talde mistoa: Batetik, zerrenda baten hautatu eta zerrenda horri dagokion talde politikoan sartzen ez diren zinegotziak eta, bestetik, hasieran sartu ziren udal talde politikoa uzten duten zinegotziak.

18.3.Zinegotziak ezingo dira aldatu talde politikoz, aipatu talde mistora izan ezik, hori guztia Araudiaren 16.3 eta 17.1 artikuluetan xedatutakoaren kalterik gabe.

19. artikulua.Udal talde politikoen eraketarako prozedura.

19.1.Udal talde politikoa eratzeko taldea osatuko duten zinegotzi guztiek sinaturiko idatzi bat aurkeztuko dute Idazkaritza Nagusian. Eraketa idatzi horretan bertan agertuko da zein izendatzen den talde politikoa bozeramaile, ordezkokoak ere izendatu daitezkelarik.

19.2.Eraketa idatziak Udalbatza berria eratu eta hurrengo bost astegunetan aurkeztuko dira

20. artikulua.Udal talde politikoen aldaketa prozedura.

20.1.Araudi honetako 16.3 artikulua babesean udal talde politiko bereziak eratzeara aukeratu duten alderdi politikoen federazioek eta koalizioek, asmo hori jasotzen duen, eta alkateari zuzendurikoa izango den idatzia aurkeztuko dute Idazkaritza Nagusian

20.2.Idatzi hori udal talde politikodberria osatuko duten zinegotzi guztiek sinaturikoa izango da, eta bertan agertuko da:

a)Talde politikoa nortzuk osatu dute.

b)Talde banandua eratzeko berarizko borondatea.

c)Taldekoko bozeramailea eta ordezkokoak baleude.

20.3.Aurreko puntuetan aitatzen den idatzi horri erantsirik, udal talde politiko horrek errepresentatuko duen alderdi politikoa oniritzi idatzia aurkeztuko da.

20.4. Udal talde politiko berrien berri Udalbatzari ematea alkateari dagokio, eraketa eskaera egin eta hurrengo Udalbatza bilkuran.

HAMARGARREN SEKZIOA

UDALEKO AHOKU BATZARRAK

21. artikulua. Eraketa.

Aholku Batzarren sorrera Udalbatza Plenoari dagokio. Batzar hauen helburua, udal gaietan herritarren eta horiek osaturiko elkarteen partaidetza bideratzea da. Udalbatza Plenoak finkatuko ditu Aholku Batzarretako osaketa, antolakuntza eta ihardute-eremua, dagozkion erabakien bidez.

22. artikulua. Helburua.

Oinarrizko helburu hauek dituzte Aholku Batzarrek:

—Dagokion arloan erizpideak landu, proposamenak egin, eta, orokorrean, ekimenak sustatu.

—Bestelako Udal organuen kudeaketa kontrolatu eta aztertu, bere ardurapeko eremuetan.

23. artikulua. Egitekoak.

Egiteko hauek dituzte Aholku Batzarrek, bakoitzari dagokion arloan:

a) Proposamenak, ekimenak, iradokizunak eta kexak Udalari aurkeztea, dagokion Udal Organuak (Batzorde Informatzailea, Tokiko Gobernu Batzarra, Udalbatza Plenoa) azter ditzan.

b) Txostenak egitea, bere ekimenez, edota Udaleko ordezkariak duten organuek hala eskaturik.

c) Bere erizpidea azaltzea, Alkatetzak, Tokiko Gobernu Batzarrak edota Udalbatza Plenoak erabakiak hartu baino lehenago

d) Udaleko Alkatetzak, Tokiko Gobernu Batzarrak eta Udalbatza Plenoak hartzen dituzten erabakien berri izatea.

e) Aipaturiko organuen kudeaketaren azterketa eta jarraipena egitea. Informazio- eskubideari dagokionez, administrazio publikoaren espedientei buruzko informazio- eskubidea xedatzen duen araudi orokorra kontutan hartuko da.

f) Urtero, bere iharduerari buruzko txostena onartzea.

g) Orokorrean, kontsulta-izaerari dagozkionak.

24. artikulua. Osaketa.

Arlokako Aholku Batzarrak honela osatuko dira:

—Udaleko Zinegotzi arduraduna, Batzarreko Lehendakaria izango delarik.

—Arlo bakoitzean diharduten erakundeen ordezkariak.

—Herritar interesatuak, independente gisa.

25. artikulua. Batzarraren kideen egitekoak.

a) Batzarra osatzen duten kideek hauek egin ahal izango dituzte:

—Bilkuretako eztabaidetan parte hartu.

—Batzarrari dagokion arloari buruzko azterketak eta proposamenak egin.

—Boto eskubidea erabili eta, hala badagokio, boto partikularra izan, zein motibo duten adieraziz.

—Galde-erreguak egin.

—Batzarkide izaerari dagozkion beste egitekoak gauzatu.

b) Batzarkideek ezingo dute ordezkari izan, izan ere batzarburuari baino ez dagokio hori. Hala ere, organoak berak balioz erabakitako arau batek edo akordio batek batzarburua ez den ordezkaria izenda dezake kasu jakin bakoitzerako.

c) Aholku Batzarretako kideek aho batez hartuko dituzte bere akordioak, eta ezinezkoa izango balitz, gehiengoz. Hala ere, edozein akordioa onartu ahal izateko, bertaraturiko entitate gehienek adostasuna ezinbestekoa izango da, bere ordezkarien botuen bidez.

26. artikulua. Batzarburuaren egitekoak.

—Batzarra ordezkatzeari, horrela erabakiko balitz.

—Bilkura arruntak eta bereziak deitzea.

—Gai zerrenda onartzea.

—Bileren nondik-norakoa zuzendu eta moderatzea.

—Herritar eta entitateen parte hartzea bermatzea.

—Hauen arteko harreman koordinatzea: Arlokako Batzarra, Udalaren Gobernu eta Kudeaketa Organoak, eta udal zerbitzuak; eta,

—Batzarburu izaerari dagozkion beste egitekoak betetzea.

27. artikulua. Lan batzordeak.

27.1.Lan batzordeak eratu ahal izango dira, dagokion arloarekin lotutako gai jakin batzuk aztertzeko, batzarrak beharrezkotzat jotzen duenean.

27.2.Batzarrak zehaztuko ditu osaera, izena eta funtzionamendua.

27.3. Bidezkotzat eta beharrezkotzat jotako udal laguntza teknikoa edo kanpokoa eskatuko du batzarburuak.

27.4.Jorratutako gaien berri emango diote lan batzordeek batzarrari.

28. *artikulua.Aholku Batzarraren kideen partaidetza, eskubideak eta betebeharrak.*

A)Aholku Batzarraren kidea izateko honako pausoak emango dira:

—Eskatzaileak, dagokion eskaera aurkeztuko du Udal Erregistroan.

—Elkarte bat izango balitz, Udaleko Elkarteen Erroldan inskribaturik dagoela egiaztatuko du.

B)Batzarren kideen eskubideak honako hauek izango dira:

—Batzarrarentzat interesgarria den edozein gairi buruz eta dagokion arloarekin lotuta dagoen edozein gairi buruz, Udala gobernatu eta kudeatzeko dauden organo aginpidedunek hartutako erabakien berri izateko.

—Aktan jasoko diren eta Batzarrak aztertuko dituen proposamenak egiteko; eta,

—Batzarrean eratzten diren lantalde edo lan batzordeetan parte hartzeko.

C)Batzarren kideek honako betebeharrak izango dituzte:

—Egiten diren bileretara joatea; eta.

—Batzarraren ordezkaritza daukaten pertsonak helbidean edo egoera juridikoan edozein aldaketaren berri ematea.

29. *artikulua.Bilkura arruntak.*

29.1.Aholku Batzarrek hilean behin bilduko dira, era arruntan.

29.2.Bilera edo bilkura arruntetako deialdia gutxienez bi lanegun lehenago egin behar da.

29.3.Deialdia egin baino bi egun lehenago izan behar ditu Batzarreko idazkaritzak jorratu behar diren gaien eskaerak.

29.4.Batzarburuak, bere ekimenez edo batzarreko edozein kidek hala eskaturik, urgentziaz eta hasi baino lehen, gai zerrendan ez datorren edozein gai sartu ahal izango du.

30. artikulua. Bilkura bereziak.

30.1. Bilera bereziak honako kasu hauetan egin ahal izango dira:

—Batzarburuaren deialdiaz.

—Ordezkatuako elkartearen %15aren eskaeraz.

—Partaide guztien %25aren eskaeraz.

30.2. Deialdia eskatu eta hurrengo bi lanegunen barruan deitu behar da bilera berezia.

30.3. Bilera egin baino 48 ordu lehenago egingo da deialdia.

31. artikulua. Bilkuren araudia.

31.1. Batzarra eratutzat joko da lehen deialdian, gutxienez, osatzen duten eskubide osoko kideen erdia baino pertsona bat gehiago dagoenean bileran, eta bigarren deialdian, berdin diolarik zer kopuru duen.

31.2. Batzarreko kideak diren elkarte guztien gehiengo absolutuaren aldeko botoa behar da, Batzarraren funtzionamenduaren barne arauak onartu eta aldatzeko.

31.3. Bilkura bakoitzaren akta jasoko du idazkariak, eta akta horretan hauek jasoko dira: Zein etorri den, erabakitakoen alderdi nagusiak eta hartutako akordioaren edukina.

31.4. Batzarkideek halaxe eskaturik, hartutako akordioarekin bat ez datorren botoa edo abstentzio botoa agertuko da aktan.

31.5. Aktak hurrengo bilkuran onartuko dira, baina idazkaritzak ziurtagiria egin ahal izango du, hartu izan diren akordio espezifikoei buruz, geroago akta onartzearen kalterik gabe.

Hartutako akordioaren ziurtagirietan, akta onartu baino lehen emandako akordioak, berariaz adieraziko da zer hori.

32. artikulua. Bestelako Udal organuekin harremanak.

Usurbilgo Udaleko Alkate, Alkateorde, Tokiko Gobernu Batzarra, eta Udalbatza Plenoaren ebazpenak Aholku Batzarrekin adosten saiatuko dira, dagozkien elkarriketako tresna guztiak garatuz., beti ere aipaturiko udaleko ordezkari-organoei baino ez dagozkiela erabaki ahalmenak kontutan harturik.

HAMAIKAGARREN SEKZIOA

HERRITARREN PARTAIDETZA ETA INFORMAZIOA

33. artikulua.

33.1. Jarduera eta herritarren partehartzeari buruz Korporazioak informazio zabala emango du. Partehartze honek ez dio Udal Organuak duten erabakitzeko ahalmenari kalte egingo.

33.2. Herritar guztiek eskubidea dute udal erabakien kopiak, egiaztagiriak eta hauen aurrekariak eta baita artxiboak eta errejistroak kontsultatzeko, egungo legeak dioen arabera.

33.3. Herritarrek Udal Organuetara beraiei partikularki zuzenean dagokizkien eskaerak egiteaz gain Udal aginpidea duten erabaki edo ekintzei buruz eskaerak egin ditzazkete ere. Eskubide honen erabileran eskatzaileentzat ez da sortuko ingongo kalterik, delitu edo faltan jardutean izan ezik.

33.4. Interesatuak egiten dituzten eskarrietan izena, helbidea eta N.A.N. zenbakia jarri beharko dituzte eta Udaletxeko Erregistro Orokorrean aurkeztu.

33.5. Egituraren hobekuntza, udal zerbitzuen funtzionamendua edo edozein udal organuen jardueraren irregularutasun edo ohikoa ez den egoerari buruzko eskaerak ofizioz egingo dira eta eraginkortasun osoa lortu ahal izateko behar den espedientea bideratuko da.

33.6. Eskaerak aurkezten zaizkion udal organua aginpidea ez duela antzematen bada, eskaera, eskuduna duen organura igorriko da, eta honen berri eskaera egin duenari emango zaio.

33.7. Edozein herritarrek udal ondasunen eta eskubideen defentsan behar diren neurriak hartzea eska diezaioke Udalari.

33.8. Udal Administrazioak herritarren interes orokor edo sektorialak babesteko Elkarteen garapenean lagunduko du. Ekintzei buruz informazio zabala emango du, eta ahal duen neurrian Arautegi honetako 16.1. artikuluan azaldutakoaren arabera beraien ekintzak aurrera eramateko dirulaguntzak emango ditu.

33.9. Herriko bizilagunek, hala eskaturik, eskubidea eta aukera izango dute herri kontsultak eta erreferendunak egiteko, eta hau aurrera eramateko beharrezko baldintza izango da 16 urtetik gorako biztanlegoaren %10aren sinadurak aurkeztea.

HAMABIGARREN SEKZIOA

PERTSONALGOA HAUTATZEKO EPAIMAHAIK ETA KONTRATAZIO MAHAIK

34. artikulua.

34.1. Udaleko pertsonalgora hautatzeko Epaimahaietan, eskubide osoko kideez gain, udal talde politiko bakoitzak izendatu ahal izango du gutxienez ordezkarik bat eta gehienez hiru, parte har dezaten. Ordezkarik hauek hitz-eskubidea izango dute, baino ezingo dute bozkatu.

34.2.Udal Talde politiko guztiek izango dute ordezkari bat gutxienez eta hiru gehienez Kontratazio-Mahai bakoitzean, ekainaren 16ko 2/2000ko Herri-Administrazioetako Kontratuen Legearen 9gn.-3 Xedapen Gehigarrian xedaturikoaren kalterik gabe.

Erabaki hau finkoa da eta amaiera jarri dio administrazio-bideari.

ERREKURTSOAK

Erabaki honen aurka auzitara jo aurretik, interesdunak, hala nahi izanez gero, erabakia berraztertzeke errekurtsua aurkez dezake azaroaren 26ko 30/1.992 eta urtarrilaren 13ko 4/1999 Legeen arabera Udalbatza Plenoaren aurrean. Eskatzaileak hilabeteko epea dauka horretarako:erabaki honen jakinarazpena jaso eta biharamunetik aurrerako hilabete osoa.

Bestela, erabaki hau berraztertzeke eskatu orde, edo berraztertzeke errekurtsuaren erantzunaren aurka joko balu, zuzen zuzenean administrazioarekiko auzi-errekurtsua aurkez dezake. Interesatuak bi hilabeteko epea dauka horretarako, erabaki honen jakinarazpena jaso eta biharamunetik hasita. Errekurtsua aurkeztekotan Gipuzkoako Kontentzioso-Administratiboetarako Epaitegira jo behar da. Bestaldetik, birjarpen errekurtsua erantzun gabe utziko balu Administrazioak, interesdunak sei hilabeteko epea izango du, errekurtsua tartekatu zuen datatik kontatzen hasita, administrazioarekiko auzi-errekurtsua aurkezteko.

Usurbil, 2005eko uztailaren 29a.—Alkatea.

(2838) (7577)